

IRITZIA

Erregimenak linfoma bat dauka Gipuzkoan



Pello Zubiria Kamino

@pellozubiria

ARGAZKIAK: DANI BLANCO

Markel Olano Arrese diputatu nagusia hurbildu zenean Hernanin Oronak daukan *Ideo* eraikin futuristara Gipuzkoako euskalgintzarekin hizkuntza estrategia berria konpartitzera, dozena bat zahar aurkitu zituen atarian “Erraustegirik ez” pankarta eskuetan, Zubietako errauste plantak kaltetutako hamabi aiton-amonaspaldiko euri zaparradarik handienaren azpian blai eginda. Ez bilatu argazkia egunkarietan.

Egun gutxi beranduago Donostialdeko autobideak butxatu zituen ziento erdi bat kotxezko ‘Barraskilo Operazioa’ren albisterik ere ez duzu aurkituko. Orobat Azpeitian Altuna y Uriaren egoitzan protesta alaitsua egin zuten gazteenik. Eta menturaz maiatzaren 27an Zubietan Errausketaren Aurkako Mugimenduak bildutako jende multzoaren eta mezuen oihartzunik ere ez zenuen topatuko, baldin eta Gipuzkoa Zutikeko gazte adoretzuek ez balute egun berean mila laguneko jendetza eraman –mila bai, gazteak gehienak, heldu asko, 80 urtekoren batzuk tartean– erraustegiaren ‘0 eremura’. *Ez etsi, ez onartu erraustegia, bakean eta irmo, #ResistZubiet*a. Gazteek horrelako kemen, antolakuntza eta fundamentu irakaspena eman behar zigutenik...

Denaren jabe egin da, ustez, Gipuzkoa Garaile bataiatu zuten lobby oligarkikoa. Esku batekin PNV+PSOE+PP erregimena, onartuko al zait boterea ezartzeko formularen definiziotzat “erregimena”, ez darabilt isekatzat. Bestearekin Gipuzkoako *establishment* enpresariala, zeinari bermerik postmodernoa ematen dion orain Mondragon Corporationek, bere banku, supermerkatu, industria, unibertsitate eta guzti, Arrasateko kooperatibismoaren deriba neoliberalak. Erregime-

na guztiaren jabe eginik, zenbait arlotan “zubilanak” aipatzea bihurtu da zubiak eraikitzea baino irabazleen artera dotoreziaz igarotzea edozein zubitan barrena. Barkatu gordin mintzatzea, lagunok.

Arazo bakarra da... historia amaitutzat jo duteneko paradisu “post-gatazka” hau ez dela esajeratuki makillatutako gaixo bat baizik. Hedabide nagusi pribatu zein publiko *bananeroek* doi-doi saltzea lortzen duten Gipuzkoako oasi harrak joa. Zubietako zuloa da kantzerria azaleratzen duen koskorra.

Mundu osoa krisian eta zuek 2007 aurkeko bizimodura itzultzea posible dela sinetsaraziz engainatu nahi duzue minbizi erasokorrak jotako gizartea? Zein soin atal erazi beharko diguzue hurrena Confesbak jarraitu dezan *business as usual*? Zein herri sakrifikatuko dugu ondoren, eskoriatarako ez bada kea salduko duen usina berri bat eraikitzeko? Nori kenduko zaizkio laguntza sozialak diru publikoen alferrikako beste obra batekin harrapatzaile pribatuak gizenagotzeko? Herritarroi zein eskubide gehiago kenduz ugarituko dizkiguzue gaixotasunak, ondoren sendaezinentzako artatze pribatu eternoak zeuok berriro kobratzeko? Zer egingo dute ezker alternatiboek podiumeko bigarren postua nori hartuko duen errezeloz elkarri markajea egiteaz gain? Ardanza-2 aro itogarri honetan herri hau Erabakitze Eskubidea erabiltzeko prest dagoela aldarrikatuz bagoaz norabait?

Hamar urteotan ikasi dugunarekin, zalantzarik txikiena ere ez da geratzen hondakinen kudeatzeko sistemen arteko alderaketan. Errausketa da sistema txarrena, garestiena, zikinena, kaltegarriena. Azalduta dago, Gipuzkoa erdian











frogatuta, ez da beste misteriorik. Hala ere, lehendik lantegi kutsagarriaz gainezka dagoen Donostialdean lehenbiziko erraustegi kamuflatuari –Rezola- Gipuzkoak behar ez duen bigarren erraustegi bat gehitu nahi diote, jaramonik egin gabe osasun aldetik, urgentziaz behar ditugun lanpostuetatik, bideragarritasunetik, ingurumenaren zaintzatik eta diru publikoen erabilera zuhurretik aurkeztutako oharretako bakar bati, gaur bertan azken zaborra 40.000 tonatara murriztu dezakeen gizarte bati 200.000rentzako labe kutsagarria ezarri eta pagaraziz. *Domuit Gipuzkoa* eta kito.

Azken hilabeteotako mugimendu eta deklarazioak oso oker ulertu ez badiugu, Gipuzkoako agendaren jabe den erregimenak bezala agendaren gatibu diren opositore nagusiek dagonekoz egintzat eman dute Zubietako erraustete planta. Herritar asko ala gutxi izango dira etsi gabe aurrean jarriko zaizkienak? Injustizia onartzen ez dutenek gaituzte erregimenak ezarritako *omertà* lotsagarriaren hesiak? Gipuzkoarren jenioa esnatuko al da? ■



Martxaren helburua erraustegiaren eremura sartzea zela finkatu ostean, irizpideak eman zituzten antolatzaileek. Bananduta atera ziren hiru zutabeek goian egin zuten bat. Ertzaintzak eta segurtasun pribatuak ezin izan zuten ekidin bidean makinariari koloretako pintura botatzea. Lan eremura sartu ziren asko, beste asko kanpotik txaloka zituzten bitartean. Helburuak beteta, Zubietara itzuli ziren.


MOYUA
 HILETA ZERBITZUAK
Zure momentu zailtarako
 Tel.: 943783447 - 617442466
 mmoyua@telefonica.net
 Otadui Gotzaina kalea, 27 - Oñati

LUAarkitektoak
 hirigintza
 hirigintza aholkularitza
 udal planak
 urbanizazioak
 peritazioak
 balorazioak
 etxebizitza proiektuak
 birgaitzeak
 barne diseinua...
 Tel 948 13 26 97
 lua@luark.com
 Río Arga Kalea 28, 31014 Iruña


tradEBI
 EB Traducciones Itzulpenak, S. L.
tradebi@tradebi.com